

ENTREGUISMO TA CABANDO CU AUTONOMIA DI ARUBA

ORANJESTAD (AAN) Manera un bom e noticia a cay ayera, cu Henny Eman lo a manda un carta pa gobierno di Hulanda y cual carta su contenido ta un entrega total di autonomia di gobierno di Aruba na gobierno di Hulanda.

Via e emisora TOP FM, e lider politico di partido MEP señor Nelson Oduber y tambe señor Rudy Croes, a cuestiona e carta cu Henny Eman lo a manda pa Ministro Hulandes Joris Voorhoeven, cu ta encera palabracionnan y stipulacionnan encuan to nombramento di ministranan di gobierno di Aruba.

Segun señor Nelson Oduber, e carta aki a ser manda pa gobierno di Hulanda y e carta ta nada mas y nada menos cu otro acto di entreguismo di parti di señor Henny Eman, pero e biaha aki esaki ta un acto di entreguismo den e fase culminante den minamento di

autonomia di pais Aruba.

Señor Rudy Croes di partido MEP tabata puntra su mes, ta kico mas Henny Eman por entrega na Hulanda, despues di a entrega Seguridad Nacional, laga pone KB riba cabez di Ministro Watty Vos, entrega di Warda Costa, raport De Ruiter, Raport Koerten, ley di Extradicion etc etc.

Segun Nel y Rudy e carta ta encera cu esnan cu a traha e acuerdonan menciona den e carta, ta bay determina pa Aruba ken si y ken no ta bira Ministro y nan a cuestiona fuertemente e accion aki di parti di Henny Eman.

Aruba nunca por a mete den asuntunan manera ken si y ken no ta bira Ministro, Burgemeester o Gobernador di La Reina na Hulanda y awor via un areglo scondi cu Henny lo a haci cu Hulanda, gobierno Hulandes ta bay dicta ken ta por bira Ministro na Aruba y ken no!!!

Tambe Rudy tabata puntra su mes kico ta e motibo cu Henny cada biaha ta dispuesto pa entrega tanto asina na Hulanda y ta kico Hulanda tin cu Henny ta bay asina na nan amen?

Ayera den transcurso di dia DIARIO a logra di haya copia di e carta cu no tin fecha riba dje, pero cu si ta firma pa señor Henny Eman, Prome Ministro di pais Aruba.

E carta ta cuminza mencionando: "Acuerdonan encuan to incompatibilidad di interes y funcion pa ministranan y ministro Pleni Potenciaro".

Na cua acuerdonan señor Henny Eman ta referi den su carta?

Ta cu ken Henny a haci e acuerdonan / palabracionnan aki y riba ki dia esakinan a ser haci, cu ki autoridad y cu kende el a consulta pa yega na tal acuerdonan?

Punto I ta menciona punto nan cu un candidato pa bira

ministro mester cumpli cune, prome cu declamacion (= worde treci pa dilanti como candidato) pa ser nombra como Ministro, tuma lugar.

Un hala di punto ta ser menciona encuan to ki interes un candidato tin den un o mas negoshi y ki sorto di funcion ki labornan e tin y ta haci?

Cuan to placa y propiedad e candidato tin y tambe e candidato mester duna cuenta di ki sorto di trabao su miembro nan di famia tin cuan to, placa nan tin etc etc.

Asina tin hopi mas punto cu e candidato mester cumpli cune na duna informacion, prome cu e por ser nombra como candidato.

Na ken e mester duna tur e informacionnan aki?

Aki ta bin loke ta e punto cayente pasobra tur candidato mester pone tur informacion di nan mes y di nan famia etc etc, disponibel na e Formado kende na e mesun momento ta Prome Ministro di Aruba tambe y den e caso aki esaki ta nada mas y nada menos cu Henny Eman en persona pasobra e ta formado y Prome Ministro actualmente.

Hun to cu Formado / Prome Ministro, e candidato pa bira Ministro mester bay sinta pa asina delibera cua funcionnan etc etc e ta laga cay y esaki ta tuma lugar segun huicio di e Formado / Prome Ministro.

Un solo persona manera Formado / Prome Ministro por tin e huicio husto pa determina kico un candidato por haci o laga di haci?

Di unda Henny ta saca e autoridad pa considera su mes den e caso aki como Formado y Prome Ministro cu e riba su mes por huzga pa un candidato sin cu su huicio por eroneo?

Esaki no mester ser haci door di un comision special y no door di un solo persona?

Cu e acuerdonan aki Formado / Prome Ministro ta duna su mes un autoridad, cu e mes a hinca den otro, cu no ta uno, democratico y cu ta bay den un direccion di poder totalitario peligroso?

Punto 4 di seccion I di e carta ta menciona cu e Formado / Prome Ministro ta consulta cu e candidato si ta necesario pa e candidato haci un examen medico!!

Henny ta docter cu e por saca afor si un candidato mester ser examina medi-

camente si o no?

Den punto 5 e punto mas peligroso ta ser menciona pasobra aki e Formado / Prome Ministro, ta haya e autoridad pa dispone di informacionnan di investigacion hudicial haci riba un candidato, di parti di Procurador General!!

Ta for di ki tempo un Ministro manera Prome Ministro o Formado di gobierno por dispone di informacionnan hudicial / policial di un ciudadano?

No ta asina cu ta polis y Ministerio Publico so por dispone legalmente di informacionnan hudicial / policial di un ciudadano?

Cu e sistema aki cu Henny lo a palabra cu Hulanda, nos sistema di Trais Politica no ta yega na su fin abrupto?

Kico ta pasa cu e informacion cu Formado ta haya di PG, si e Formado no logra forma gobierno y e mes no bay den gobierno o e sali di politica?

Esaki no ta un violacion flagrante di derechonan di un ciudadano?

Ni MEP ni OLA a ser consulta encuan to e acuerdonan cu Henny Eman ta menciona den su carta.

Ta via ki sistema e acuerdonan y reglanan aki lo mester worde implementa pasobra ministranan di Consejo di Ministro no tabata na altura y no tin ningun proyecto di Ley asina den Parlamento y menos cu un Landsbesluit a ser treci pa dilanti door di Henny.

Ta pa medio di un KB Hulandes e acuerdonan aki cu Henny Eman a haci, lo ser imponi riba candidatonan cu kier bira Ministro?

Awor ningun caminda den e carta ta ser menciona ta ken ta bay controla y investiga e Formado / Prome Ministro cu den e caso aki ta señor Henny Eman.

Esaki ta encera cu segun e acuerdonan aki e Formado / Prome Ministro den e caso aki Henny Eman, lo ta para riba ley?

Esakinan tabata preguntan cu politiconan y analisisnan tabata haci ayera, ora cu nan a haya copia di e carta cu ta contene acuerdonan cu Henny Eman a firma.

**MAS DETAYE
NA PAGINA 10**

KIWANIS CLUB OF ARUBA TA RECORDA E FUNDADOR WHITFIELD



ORANJESTAD (AAN): Diadomingo 11 di Januari cu a pasa, Sra. Viuda Mosa Whitfield hun to cu miembro nan di Kiwanis Club of Aruba y demas famia a corda e hecho cu 5 aña pasa, riba 12 di Januari 1993, Clint Whitfield a fayece.

El a worde conmemora cu un Santo Sacrificio di Misa na Iglesia San Francisco, unda posteriormente a sigui un ceremonia chikito cu ponemento di krans na tumba di e defunto, door di e miembro-

nan di Kiwanis Club of Aruba.

Clint Whitfield tabata e fundador di Kiwanis Club of Aruba, cual club el a funda dia 21 di November 1964. Clint tabata e prome presidente na aña 1965. Despues el a ocupa e puesto di Lt. Governor di Kiwanis International na aña 1968 y 1969, y na 1974 el a ocupa e puesto aki part-time.

El a worde eligi Governor di Kiwanis International na aña 1978.

Prome y durante e periodo di Kiwanis, Clint tabata hopi activo den comunidad di Aruba. na aña 1946 el a worde pidi door di Obispo pa yuda y tuma e responsabilidad na San Pedro Hospital.

Voluntariamente Clint a yuda cu e comienzo di Aruba Caribbean Hotel na aña 1949. Tambe e tabata activo den Aruven y Camara di Comercio na Aruba y di Las Americas.

Aunke Clint no ta cu nos mas, su trabaoan lo sigui.